

Carta nachindahá Pablo nuú na cúu cuéntá Jesús ñuu Colosas

Chíndahá Pablo Ndióxi coo na cúu cuéntá Jesús ñuu Colosas

1 Yehe cúu Pablo, da nandicaxi Ndióxi cacuu u apóstol cuéntá Jesucristo. Ta yóho íin Timoteo, ñaní, da cúu cuéntá Jesús. ²Chíndahá nde carta yóho nu ndo, na cúu cuéntá Ndióxi ndúu ñuu Colosas jan. Jáchi cúu ndó na cúu cuéntá Jesucristo, na cándéé cáhnu ini mé á. Ña cúní nde quéa ná caja cuaha Ndióxi, tátá yo ñamaní xihín ndo ta ná caja ña ná coo vaha ínima ndo.

Xíca tahví Pablo sahá na cúu cuéntá Jesús cán

³Níí tiempo ndíquiahva nde ndixahvi nu Ndióxi, mé a cúu tátá Jesucristo, xitoho í tá xíca tahví nde nu mé á saha ndo. ⁴Jáchi sa ñañehé nde tuhun ña cándéé ini ndó Jesucristo ta ñañehé nde tuhun ña quíhvi ini ndó tóco ndihi na cúu cuéntá mé á. ⁵Ta cája ndó ña yóho jáchi sa nacandaa ini ndó ña ndaa sahá Jesucristo ta ndáti ndó ndiquehe ndó ña quiahva Ndióxi nu ndó indiví. Ta janda naní naxini johó ndó tuhun vaha cáhan sahá Jesucristo já nacasáhá cúní ndó cuhun ndó indiví. ⁶Mé tuhun vaha naxini johó ndó sahá Jesucristo yóho nacasáhá ndícuíta nuu a nuú ñayivi ta cuahá na sa cándúsa ña ndijáá níí cúu saha ñuyíví. Ta tóco ndihi na cán cája na tá quiahva nacaja mé ndó tá naxini johó ndó ña quíhvi ini Ndióxi ndohó ta já nacandaa ini ndó ña mé a ndaa táhyí quíhvi ini Ndióxi ndohó. ⁷Ña yóho quéa najánaaha da naní Epafras nu ndo. Mé a ndaa quíhvi ini nde da jáchi in cúu da cája chúun da xihín nde ta mé a ndaa nacaja chúun da nu mé ndó xihín ndinuhu ini da tá najánaaha da ndohó tuhun Ndióxi. ⁸Ta tá naquixi da yóho já nacaxi tuhun da xihín nde ña cája ínima yíi Ndióxi ña quíhvi ini ndó na cúu cuéntá Jesús.

⁹Ta janda naní nacandaa ini nde sahá ña cája ndó já nacasáhá xíca tahví nde nu Ndióxi saha ndó ndijáá níí quíhvi. Ta xíca tahví nde nu á ña ná nahá nu ndo ña cúní mé á caja ndó. Ta xíca tahví nde nu á ña ná quiahva mé á ndaja táhan ña ndichí nu ndo ta ná caja mé á ña ná candaa ini ndó tóco ndihi ñaha cuéntá mé á. ¹⁰Já quéa ná cuu caja ndó tá quiahva ndítahan

caja ndó jáchi cúu ndó ñayivi cómi Ndióxi cuénta saha. Ní tiempo xíní ñúhú caja ndó ña cájii ini mé á xihín. Ta quiahva já xíní ñúhú ñaha ndó ña cája tá cája ndó ña vaha xihín ñayivi ta quiahva já xíní ñúhú candaa chága ini ndó saha Ndióxi. ¹¹Ta quiahva já xíca tahví nde nu Ndióxi ña ná ndaja ndacú a ndohó xihín ndée cáhnu ndivaha mé á já quea cuu caja ndeé ini ndó ta já a ndíhi ini ndó tá ná quixi cuahá tondóhó nu ndo. Ta cajii ini ndó ¹²ndiquiahva ndó ndixahvi nu Ndióxi jáchi nasacu tiahva mé á ndohó ña ná ndiquehe ndó ña nasacu ini mé á quiahva nu tóco ndihi na cúu cuénta mé á tá ná xinu coo na nu yéhe ndivaha nuú cacomí mé á cuénta saha ná. ¹³Nasanduu yó nuú ña ndivaha ta cán ñatavá Ndióxi mí ndáha ña quini ta nandiquiahva mé a mí ndáha Jesucristo, jahyi máni á ña ná cacomí a cuénta saha yo. ¹⁴Ta mé Jesucristo najácacu a mí tá naxihi a ndica crúxu ta ñacaja cáhnu ini a sahá cuachi.

Jesucristo cúu á jini nu tóco ndihi ñaha

¹⁵Ta Jesucristo cúu yuhú nuu Ndióxi, ña a cúu cuni tívi ta janda tá cámaní casáhá cavaha Ndióxi ñuyíví yóho sa íin jahyi a, Jesucristo. ¹⁶Ta sa mé Jesucristo ñacavaaha tóco ndihi ñaha ndúu ñuyíví yóho xihín ña ndúu indiví. Ta mé á ñacavaaha tóco ndihi ña xíní xihín nuu yo xihín ña a cúu cuni. Ta ñacavaaha mé á táto Ndióxi, ña cómi chuun cuénta Ndióxi ta ñacavaaha java ga táto a, na íin cuaha ndée cahnda chuun. Tóco ndihi ña yóho ñacavaaha Jesucristo ña ná cacuu a ñaha mé á. ¹⁷Ta sa íin va mé á tá cámaní cava sahá saha tóco ndihi ñaha ta cája mé á ña ná cuu canduu tóco ndihi ñaha indiví xihín ñuyíví. ¹⁸Ta cúu á jini nu tóco ndihi na cúu cuénta mé á, ña cúu tátuhun yiquí cuñu a. Ta mé a cán caja ña ná ndihvi ñayivi íchi mé á catacu na xihín ndée a jáchi anda saha nasahiin mé á ta jihna ñúhú nanditacu tucu a tañu na sa naxihi. Ta xihín ña yóho naxinu coo a nanduu a jini nu tóco ndihi ñaha. ¹⁹Tá quiahva cáa Ndióxi quiahva cáa ri Jesucristo jáchi já cúní Ndióxi coo. ²⁰Ta cúní ri Ndióxi ndique táhan máni tucu a xihín tóco ndihi ña ñacavaaha. Ña cán quea naxihi Jesucristo ndica crúxu já ná cuu ndique táhan máni tóco ndihi ña ndúu ñuyíví xihín indiví xihín Ndióxi.

²¹Mé ndó nasanduu xíca ndo nu Ndióxi ta naxini ihvi ndó a jáchi ndinuhu ña núu nasacahvi ini ndó caja ndó, nduu. Joo viti najándique táhan máni Ndióxi ndohó xihín mé á ²²sahá ña ñacaja Jesucristo, jahyi a tá naxihi yiquí cuñu a ndica crúxu. Já ñacaja mé á ña ná cuu xinu ndó canduu vií ndó nu á. Ta nandiquiahva mé á ndohó ndáha Ndióxi já ná cacuu ndó ñayivi vií, na coo ga cuachi nu á. ²³Joo xíní ñúhú candeé cáhnu ini ndó Jesús ta a jándacoo xóo ndó ña ndáti ndó quiahva Ndióxi nu ndo. Jáchi tá naxini johó ndó tuhun vaha sahá Jesucristo já ñacandaa ini ndó ña

cuu jácacu a ndohó. Ta sa mé tuhun yóho ndícuíta nuu ndijáá níí cúú saha ñuyíví ta yehe cúú da chindeé táhan jándicuíta nuu a nuú ñayivi.

Cája chúun Pablo cuéntá na cúú cuéntá Jesús

24Ta viti cájii ini i jáchi ndóho ini i saha ndo ta ña cája i quea jáxinu coo i ña nasacu ini Jesucristo ndoho i sahá na cúú cuéntá mé á, na cúú tátuhun yiquí cuñu a. 25Nandaja Ndióxi yehe ña ná nduu u in da caja chúun nuú na cúú cuéntá Jesús. Jáchi nasahan mé á chuun yóho nuú i ña ná chindeé e ndohó sahá ña jánaha cáxi i tuhun Ndióxi nu ndo. 26Ta janda tá nacava sahá saha ñuyíví nasahiin jehé a nuú ñayivi joo viti najánaha Ndióxi nuú na cúú cuéntá mé á ña nasahiin jehé jihna. 27Ta viti sácú ini Ndióxi naha nuú na cúú cuéntá mé á ndá quiahva náhnu ñamaní cúní caja mé á xihín na tóho. Ta ña nasahiin jehé cúú ña yóho: ndácaan Jesucristo ini ínima ndo ta xihín ña yóho vaxi quivi ndicáhnu ndó xihín mé á.

28Cáxi tuhun nde nuú ndihi ñayivi sahá Jesucristo. Ta jácahan nde na ña ná a cája na cuachi. Ta xihín ndinuhu ini nde jánaha nde nu ná ña ndítahan caja na já ná nduu na ñayivi ndaa nu Ndióxi sahá ña nacaja Jesucristo. 29Ta ña yóho cúú chuun ndúcú ndée e caja i xihín ndée cáhnu sahan Jesucristo nuú i.

2 Cúní ña ná candaá ini ndó ña ndúcú ndée e xíca tahví i nu Ndióxi saha ndó xihín sahá na cúú cuéntá Jesús ndúu ñuu Laodicea. Ta quiahva já ndúcú ndée e xíca tahví i nu Ndióxi sahá na cúú cuéntá Jesús, na a ñaha cuni táhan xihín i. 2Ndúcú ndée e xíca tahví i nu Ndióxi saha ná já ná ndihvi ndée Ndióxi ini ínima na ta in ná nduu na sahá ña quíhvi ini táhan na. Ta xíca tahví i nu Ndióxi ña ná candaá vaha ini ná ña ndaa sahá Jesucristo, ña mé a ndaa ndiyahvi ndivaha. Jáchi ña nasahiin jehé jihna najánaha Ndióxi nu ná viti ta ña yóho cúú Jesucristo. 3Ta mé Jesucristo cándaá ini a tóco ndihi ñaha. Candaá ini a ndía quea ña núu ta ndía quea ña vaha ta cúní mé á ña ná candaá ri ini mé ví ña jan. 4Cáxi tuhun i ña yóho xihín ndó ná a jándahvi inga na ndohó jáchi ndúu java na ta ndató ndivaha cáhan na joo cúú ná na jándahvi ñayivi. 5Ta vatí co íin mí i xihín ndo nu ndúu ndó jan joo ñúhu ini i saha ndo níí tiempo. Ta cájii ini i tá xíní i ña ndúu víí xihín táhan ndó. Ta cájii ini i sándehe e ña co jándacoo ndó ña cándée ini ndó Jesucristo.

6Tá nandiquehe ndó íchi cuéntá Jesús já nanduu mé á xitoho ndó. Ta viti ndítahan nu ndó caca nuu ndó xihín á ndijáá níí quivi. 7Xíní ñúhu cativi tuun ndó Jesucristo já ná quiahva mé á ndée á nu ndo. Xihín tuhun Ndióxi ña najánaha nde nu ndó jan ndítahan cándée chága ini ndó Jesucristo. Ta ná a jándacoo ndó ña ndíquiahva ndó ndixahvi nu mé á.

Íchĭ saá xíca í viti

⁸Cuéntá coo ndó ná a jándahvi na ndohó xihín ña tuhún cúni na jánaħa na nu ndo. Jáchi náħa ña quíxi a nu Ndióxi joo cúú á ña quíxi jini mé va na cuití va. Ta cáħan na saħá ña jánaħa ñayivi ñuyíví ta co cúú á ña jánaħa Jesucristo nu yo.

⁹Tá quiahva cáa Ndióxi quiahva já cáa Jesucristo vatí nanduu a in ñayivi. ¹⁰Ta nandicutú ndaa mé ndó xihín mé á jáchi in nanduu ndó xihín Jesucristo, mé a sáħndá chuun nu tóco ndihi na cómi cuéntá saħá indivi xihín ñuyíví yóho. ¹¹Ta saħá ña in nanduu ndó xihín Jesucristo saħá ña cán quea nanduu ndó ñayivi cuéntá mé á ta cúú á tátuhun naħicaan Ndióxi marca ndohó ta co cúú á tátuhun marca chícaan ñayivi yiquí cuñu na. Ña cája Jesucristo quea jácaxoo a mí nuú cuachi já quea ná a cája ga yó ña. ¹²Jáchi tá naandúta ndo cuéntá Jesucristo já naacu a tátuhun naxihi ndó ta nanduxu ndó xihín Jesucristo jáchi najándacoo ndó cuachi naċaja ndó. Ta tá nanditacu mé á naacu a tátuhun nanditacu ri mé va ndó xihín á saħá ña cán quea cúú ndó ñayivi saá viti jáchi naċandee ini ndó ña íin ndée Ndióxi ċaja ña ná nditacu Jesucristo. ¹³Jihna naacu ndó tátuhun ndii saħá cuaha cuachi naċaja ndó ta saħá ña coó naċeen ndó ċaja ndó ña sáħndá Ndióxi. Ta naċaja ndó tá quiahva cúni mé va ndó jáchi naċacomí cuachi cuéntá saħa ndo. Joo viti naċaja Ndióxi ña ná ñeħe táħvi ndó catacu ndó xihín Jesucristo ta naċaja cáħnu ini a saħa tóco ndihi cuachi ndó. ¹⁴Naċacomí yo cuachi nu Ndióxi jáchi naqueħe núu í ña naħanda mé á ċaja í. Ta ndácaan cuachi ċata yó naċaja ley joo najándoo Ndióxi cuachi tá naxihi Jesucristo ndica crúxu saħa yo. ¹⁵Ta tá naxihi a ndica crúxu já naquee vaħa mé á xihín tiñáħa saċaħa ta naquee vaħa mé á xihín rí quini, rí sáħndá chuun nuú ñayivi ñuyíví. Ta saħá ña najácaħan Jesús nuu ri nuú ñayivi saħá ña cán quea a cuú chinúu ga rí cuachi ċata yó viti. Xihín ña naċaja Jesucristo yóho najánaħa Ndióxi nu yo ña a cuú ga ċaja tiñáħa saċaħa ni in ñaha xoho.

Ndíťahan ndinducú yo ñaha íin indivi

¹⁶A queħe ndó cuéntá saħá ñayivi tá ná candehé ndaa na ndohó saħá ña xíxi ndó á saħá ña xíhi ndó. Ta ni a queħe ndó cuéntá tá sáħndéħé ndaa na ndohó saħá ña co ċaja ndó víco ċaja mé ná ta ni saħá ña co ċaja ndó víco quiví ċaja cáħnu na yoó saá. Ta ni a queħe ndó cuéntá tá sáħndéħé ndaa na ndohó saħá ña co ċaja cáħnu ndó quivi ndíqueħe ndée na. ¹⁷Saħaħa tá cámaní cacu Jesucristo já naħanda Ndióxi chuun nuú ñayivi ña ná ċaja na ley Moisés joo coó chuun a viti jáchi sa najáxinu coo Jesucristo tóco ndihi ña naħanda ley Moisés. ¹⁸A cándúsa ndó ñayivi tá cáħí na xihín ndó ña

cuhun ndó indayá sahá ña co cája ndó ña cáchí mé ná. Cája cáhnu na tátō Ndióxi ta sahá ña jan ndája tohó ndivaha na mé ná. Ta cáchí ña nacahan tívi Ndióxi xihin ná sahá ña cán quéa ndínehe jícó ndivaha na mé ná. Xíní túní ña yóho cúú á xíní túní ñayivi ñuyíví cuití va. ¹⁹Jáchí co xíca tuun ña jan xihín Jesucristo, mé a cúú jini nu mí. Mé á sahan ndée á nu yo cuahnu í ta jándique táhan mé á mí xihin á tá quiahva nasacu ini Ndióxi.

²⁰Tá naxihi Jesucristo ndica crúxu já cúú á tátuhun naxihi ndó nuú cuachi, jáchí co cómí ga ñaha ñuyíví yóho cuéntá saha ndó viti. Sahá ña cán quéa co ndítahan nu ndó caja ndó tá quiahva cája ñayivi ñuyíví yóho. Co ndítahan caja ndó ña cáchí ña xihin ndo tátuhun ña yóho: ²¹“A tñin toho ndó ña jan. A cáxí toho ndó ña cáa. A cáni ndaa ndáha ndó ña yóho”, cáchí ña xihin ndó. ²²Tóco ndihi ña yóho ndihi saha. Tóco ndihi ña cája na yóho cúú á ña sáhndá ñayivi ñuyíví cuití va ta co cúú á ña naquixi nu Ndióxi. ²³Jáchí tóco ndihi ña jána ha ña jan cúú á ña quíxi jini mé va na vatí ndáa ña tátuhun ña ndíchí jini. Ta jána ha ña ña ndítahan caja cáhnu ñayivi Ndióxi xihin costumbre nacavaha mé va na. Ta náha ña tátuhun ñayivi tohó joo ndínehe jícó ña mé ná. Ta jána ha ña ña xíní ñúhú jándoho í yiquí cuñu í joo coó saha toho ña yóho jáchí co chindeé a mí jándihi saha ña xíca ini yiquí cuñu í caja.

3 Tánanditacu Jesucristo tañu ña sa naxihi cúú á tátuhun nanditacu ndó xihin mé á. Sahá ña cán quéa xíní ñúhú ndinducú ndo ñaha cúú cuéntá Ndióxi, mé ñaha quíxi indiví nu ñin coo Jesucristo xoo cuáha Ndióxi. ²Xíní ñúhú cáhvi ini ndó sahá ñaha cúú cuéntá Ndióxi ta co xíní ñúhú ndicani ini ndó sahá ñaha ñuyíví yóho. ³Jáchí mé ndó cúú ndó tátuhun ña sa naxihi tá naxihi Jesucristo. Sahá ña cán quéa co xíní ñúhú ndiava ini ndó cacomí ndó ñaha ñuyíví yóho jáchí cuhun ndó coo ndó xihín Jesucristo indiví nu ñin Ndióxi. ⁴Ta sahá ña nacaja Jesucristo sahá ña cán quéa tácu yo viti ta tá ná canáha nuu Jesucristo ñuyíví yóho já ndacanáha nuu ndó xihin á. Tá quiahva ndiyehe ndivaha mé á quiahva já ndiyehe ri ndóhó va ta ndicáhnu ndó xihin mé á.

Jihna naxica í ichí cuachi joo viti xíca í ichí saá

⁵Ndítahan jácaxoo ndó nuú cuachi, ña cája ñayivi ñuyíví. Coto a cóo ndó xihin ñayivi, ña co cúú ñájíhí ndo á yí ndo. Ta ni a cája ndó ña núu xihin yiquí cuñu ndó ta ni a cája ndó ña núu, ña xíca ini yiquí cuñu ndó caja. Ta ni a chínúu ndó ínima ndó jatá jiuhún ndo jáchí cúú ndó tátuhun ña cája cáhnu yoco tá cája ndó já. ⁶Jáchí vaxi quíví jándoho Ndióxi ini ña cája ña yóho sahá ña co xéén ña caja na ña cúní Ndióxi. ⁷Ta janda mé ndó tá naxica nuu ndó ichí cuachi já nacaja ndó ña jan. ⁸Joo viti xíní ñúhú jándacoo ndó tóco ndihi ña jan: a cójo ga ini ndó xihin ñayivi ta ni a cája

ga ndó ña xíca ini yiquí cuñu ndó caja ta a cája ga ndó ña núu ta ni a cánahá ga ndó xihín ñani táhan ndó ta a cáhan ga ndó tuhun quini. ⁹Ta a cáhan túhún xihín táhan ndó jáchi co cúu ga ndó na nasacuu ndó jihna ta tóco ndihi ña núu nasacaja ndó jihna jan co cómi ga cuénta saha ndó viti. ¹⁰Jáchi viti sa nanduu ndó ñayivi saá, na loho loho ndivií chága ínima na cája Ndióxi janda quiahva ná xinu coo ndó nduu ndó tá quiahva cáa Jesucristo ta já candaá vaha chága ini ndó a. ¹¹Jáchi viti coó sahá ga á tá cúu yó na Israel á tá co cúu yó na Israel, á tá cúu yó na naquihvi marca yiquí cuñu í á tá coó naquihvi marca yiquí cuñu í, á tá cúu yó na toho á tá co cúu toho í na. Ta ni coó saha toho a á tá cúu yó na yucú ñúhú ta ni coó saha toho a á tá cúu yó na cómi xitoho cuénta saha, á tá cúu yó na xíca núná mé. Joo ña íin saha quéa tá ná ndiquiahva ndó mé ndó ndáha Jesucristo ña ná cacomí a cuénta saha ndo jáchi tóco ndihi na cán cúu ná na ndácaan Jesucristo ínima.

¹²Quíhvi ini Ndióxi ndohó ta nacaxi a ndohó ña ná cacuu ndó ñayivi cuénta mé á. Ta tá quiahva natahnda ini Ndióxi saha ndo quiahva já xíní ñúhú tahnda ini ndó sahá ñayivi. Xíní ñúhú caja vaha ndó xihín ná. Coto a cája cáhnu ndó mé ndó. Xíní ñúhú coo víi ini ndó xihín ñayivi ta a ndíhi ini ndó xihín ná. ¹³Xíní ñúhú coo cáhnu ini xihín táhan ndó. Ta caja cáhnu ini saha táhan ndó tá yáha nu cája xihín táhan ndó. Tá quiahva nacaja Jesucristo, xitoho í tá nacaja cáhnu ini a saha ndó quiahva já ndítahan caja cáhnu ini saha táhan ndó. ¹⁴Xíní ñúhú ndicutú ndaa ndó xihín ña quíhvi ini táhan ndó já quéa ná cuu canduu in nuú xihín táhan ndó ta já a cúu cahnda java táhan ndó. ¹⁵Ta ná caja Ndióxi ña ná coo vaha ini xihín táhan ndó já ná caja ndaa ndó xihín ná. Jáchi nasacu ini mé á ña ná caja ndó já ta nacaxi a ndohó nduu ndó tátuhun yiquí cuñu a. Ta ndítahan ndiquiahva ndó ndixahvi nu Ndióxi ní tiempo.

¹⁶Ta ná ndicutú ndaa ínima ndó xihín tuhun vaha cáhan sahá Jesucristo. Ta xihín tuhun yóho xíní ñúhú jánahta táhan ndó ta xíní ñúhú quiahva tuhun ndeé ini táhan ndó ña ná candaá vaha ini ndó ña. Ta xihín ndinuhu ini ndó xíní ñúhú ndiquiahva ndó ndixahvi nu Ndióxi. Cata ndó salmo xihín himno xihín canto ña sahan ínima yii Ndióxi nu ndo. ¹⁷Ta tóco ndihi ña cája ndó xíní ñúhú caja ndó ña cuénta Jesucristo, xitoho í. Ta xíní ñúhú ndiquiahva ndó ndixahvi nu Ndióxi, tátá yo sahá ña nacaja Jesucristo, xitoho í.

Ndá quiahva ndítahan canduu na cúu cuénta Jesús

¹⁸Ndóhó, najihí ndúu yíi, xíní ñúhú coo johó ndó nu cáhan yíi ndó xihín ndo jáchi já ndítahan caja najihí, na cúu cuénta Jesús. ¹⁹Ta jári ndóhó, dataa, xíní ñúhú quíhvi ini ndó ñájihí ndo ta co ndítahan caja ndó ndaja

nacuu xihin ná. ²⁰Ta jári ndóhó va, na valí xíní ñúhú taa johó ndó tóco ndihi ña sáhndá tátá náná ndo nu ndo jáchi ña yóho quea cájii ini Ndióxi xihin. ²¹Ta jári ndóhó va, na ndúu jahyi, a jácojo quini ndó ini jahyi ndó já quea ná a cávita ini na caja na ña vaha. ²²Ta ndóhó, na naxeen xitoho caja chúun uun va ndó, xíní ñúhú caja ndó tóco ndihi ña sáhndá xitoho ndó, na ndúu ñuyívi yóho nu ndo. Ta a juú tá ndíta cuití na sándehe na nu cája chúun ndó sahá ña cúni ndó candoo vaha ndó nuú na cúu xitoho ndó cán. Ña xíní ñúhú caja ndó quea caja chúun ndó xihin ndinuhu ini ndó nu ná jáchi cúu ndó na cája cáhnu Ndióxi. ²³Ndítahan cajii ini ndó caja ndó tóco ndihi ñaha. Ta ndicuhun ini ndó ña nu Ndióxi cája ndó ña ta co cúu á nuú ñayivi cuití va. ²⁴Jáchi sa cándaq ini ndó ña chahvi Jesucristo nu ndó saha tóco ndihi ña cája ndó. Ta ñehe táhvi ndo cuhun ndo indivi jáchi cája cáhnu ndó Jesucristo, mé á cúu ndusa xitoho ndó. ²⁵Joo ndá na cája ña núu tandaa quivi ndoho ini na sahá ña núu nacaja na jáchi caja Ndióxi ña ná chahvi in in na sahá ña nacaja na.

4 Ta jári ndóhó va na cúu xitoho co ndítahan jándoho nahá ndó na naxeen ndó caja chúun nu ndó jan. Ndítahan caja vaha ndó xihin ná jáchi vaxi quivi ndiquiahva ri ndóhó va cuénta nuú Ndióxi, xitoho ndó, ña íin indivi.

²A jándacoo ndó caça tahví ndó nu Ndióxi xihin ndinuhu ini ndó. Ta ndítahan coo tiaha vaha ndó ndiquiahva ndó ndixahvi nu mé á. ³Caça tahví ndó nu Ndióxi sahá nde ña ná cuná mé á íchi nuú nde cahan nde tuhun vaha sahá Jesucristo, mé tuhun nasahin jehé anda viti. Ta saha mé ña yóho ndácaan i vecaa viti. ⁴Caça tahví ndó nu Ndióxi ña ná cuu cahan cáxi i tuhun Ndióxi nuú ñayivi tá quiahva ndítahan nuú i caja i.

⁵Co ndítahan caja ndó ña yóho á ña cáa nuú na co cúu cuénta Jesús. Ta xíní núhú ndihi ini ndó cahan ndó tuhun Ndióxi xihin ná. ⁶Tóco ndihi ña cahan ndó xíní ñúhú cacuu a ña vaha, ña cuu cajii ini Ndióxi xihin. Ta xíní ñúhú cándaq ini ndó ndaja caja ndó nducú ñehe vaha ndó tuhun nuú ñayivi.

Ndíndayí Pablo na ndúu ñuu Colosas

⁷Chíndahá i da naní Tíquico nu ndó jan já ndicani da sahá i nu ndó. Mé da cúu ñani máni yo ta xihin ndinuhu ini da in cúu dá cája chúun da xihin i. ⁸Chíndahá i da saa da nu ndo já ná caxi tuhun da xihin ndo ndá quiahva ndóho nde yóho. Ta chíndahá i da já ná quiahva da tuhun ndeé ini ndó. ⁹Ta chíndahá ri ñani máni yo Onésimo, da ndíco cáhnu íchi cuénta Jesús cuahan xihin dá ta mé Onésimo yóho cúu da ñuu ndó jan. Ta mé dá xihin Tíquico caxi tuhun da nu ndó ndaja cándoo nde janda viti.

¹⁰Aristarco, da ndácaan vecaa xihin i chíndahá da Ndióxi coo ndó. Ta jári Marcos, da cúu ñani cuachí Bernabé chíndahá da Ndióxi coo ndó. Ta

COLOSENSES 4

sa naçaxi tuhun i xihin ndo ndá quiãhva ndítahan caja ndó xihin Marcos tá ná saa da coto nihni da ndohó. Xíní ñúhú ndiquehe vaha ndó da. ¹¹Ta jári da naní Jesús, da naní tucu Justo chindahá da Ndióxi coo ndó. Janda ndíhuni na yóho cuití va cúu na cuéntá Jesús, na naquixi chichi Israel cája chúun na xihín i tá xíca nuu nde cáhan nde nuú ñayivi ña cómi Ndióxi cuéntá saha ná. Ta mé a ndaa nachindeé cuaha ndíhuni na cán yehe. ¹²Ta jári Epafra, da ñuu ndó jan chindahá da Ndióxi coo ndó. Mé da cán cúu dá da cája chúun cuéntá Jesucristo. Ta ní tiempo xíca tahví da nu Ndióxi saha ndó xihín ndinuhu ini da já ná candita ndacú ndó ta ná ndiquiahva níí ndo mé ndó caja ndó ña cúní Ndióxi. ¹³Ta xíní i xihín nuú i ndá quiãhva ndíhi ini Epafra xíca tahví da nu Ndióxi saha ndo ta sahá na cúu cuéntá Jesús ndúu ñuu Laodicea xihín na ndúu ñuu Hierápolis viti. ¹⁴Lucas, da cúu doctor maní yo chindahá da Ndióxi coo ndó. Ta jári Demas chindahá da Ndióxi coo ndó.

¹⁵Cahan Ndióxi ndó xihín na cúu cuéntá Jesús, na ndúu ñuu Laodicea ta cahan Ndióxi ndó xihín ñá naní Ninfas ta xihín tóco ndihi na cúu cuéntá Jesús táca vehe ñá. ¹⁶Ta tá nandihí naçahvi ndó carta yóho caja ndó ñamaní chindahá ndó ña ná cuhun a nuú na cúu cuéntá Jesús, na ndúu ñuu Laodicea ña ná cahvi ri na cán va ña. Ta jári ndítahan nu ndó cahvi ndó carta ña nachindahá i nuú na cán. ¹⁷Ta caja ndó ñamaní çaxi tuhun ndó nu Arquipo ña xíní ñúhú ndíhi ini da caja chúun vaha da chuun naçahan Ndióxi nu dá caja da.

¹⁸Ta yehe, da cúu Pablo cáhyí i java tuhun yóho nu ndó xihín ndahá i ña ná chindahá i Ndióxi coo ndó. Xíní ñúhú ndicuhun ini ndó ña ndácaan i veca. Ta ña cúní quéa ná caja cuaha Ndióxi ñamaní xihín ndo. Já ná coo.